



Aqqalu C. Jerimiassen

UKA 2020/190

Atassut

6. Oktober 2020

Uunga siunnersuut: Unammilleqatigiinneq pillugu Inatsisartut Inatsisaata allanngortinnissaa pillugu Inatsisartut inatsisaat nr. xx, xx. xxx 2020-meersoq.
(Inuussutissarsiornermut Aatsitassanullu Naalakkersuisoq)

Unammilleqatigiinneq niuernikkut peqqinnartuuvoq atuisunullu pitsaalluni, mianersorfissaqartuaannarporlittaag. Imaassanngilagummi suliffeqarfittagut ingerlallualersimasut alliertortut allaat pisisoorsinnaalerlugit whistleblowereqarneq illersungaaruttormat.

Whistleblowereqarneq siunertamigut ajunngikkaluaqaaq, tamattami toqqisisimalluta peqquserluttuliorfigineqaratalu suliffeqarfitsigut kiffartuunneqarusuttarpugut.

Unali ajoraluartumik ernumanartumut inissisinnaasoq tassaasorinarpoq, suliffeqarfiit unammilleqatigiittut akornganni whistleblowerinut apississuinerit suliffeqarfiit akorngini kinaassusersineqarsinnaanngitsumik imminnut ajortisaanniarnermik kinguneqalersinnaanerni, USA-mi tassani perunissaa nakernanngikkaluaqimmat, susoqaallattorlu eqqartuussivitsigut aporaanniakujunnersuit piffissamik atuiffioqisut inuiaqatigiinnullu akeqartut.

Pisortat suliffeqarfiutaannut A/S-erpannguusunut whistleblowereqarneq ingerlanneqaruni unammilleqatigiinnermullu innarliutaanngitsumik ingerlanissaannut siunertaqarpat tassuuna ajorinartussaqaartinngilarput Atassummiik, taamaallaali uani suliffeqarfiit namminersortut ipisittooratarneqarsinnaaneranik kinguneqanngilluinnarnissaa kissaatiginarluni, unammilleqatigiinnerummi ilua ummaateqanngilaq misigissuseqaranilu, taamaattumik ajorsartoq ajorsartuusinnaasarpoq naggataani ajalullunilu. Tamakku pinaversaartissagutsigit, suliffeqarfiit namminersortut qanoq inissisimaneri malillugit mianerisassagut eqqummaariffingalugit whistleblowereqarneq ingerlanneqarli, whistleblowereqarnerlu annerusumik pisortat suliffeqarfipassuinut samminersumik ingerlanneqarli.

Taamatut oqaaseqarluta Atassummiik Inuussutissarsiornermut Aatsitassanullu ataatsimiitsitaliamut innersuupparput.